

**TEKS UCAPAN YBHG. DATO' MAIMUNAH MOHD SHARIFF YANG DIPERTUA MAJLIS PERBANDARAN SEBERANG PERAI SELAKU Pengerusi Pengelola Kejohanan Hoki Dewan (LELAKI) SEMPERNA MAJLIS PERASMIAN PENUTUP DAN PENYAMPAIAN HADIAH KEJOHANAN HOKI DEWAN (LELAKI) ANJURAN MAKSAT PULAU PINANG TAHUN 2015 PADA 22 MAC 2015 (AHAD) MASA 4.30 PETANG DI PENANG FREE SCHOOL, JALAN MASJID NEGERI, PULAU PINANG.**

Bismillahir rahmanir rahim

Assalamualaikum warahmatullahi

Wabarakatuh,

Salam Sejahtera

Ahli-ahli Jawatankuasa Kerja MAKSAT Pulau Pinang,

Ahli-Ahli Jawatankuasa Pengelola Kejohanan

Para pemain dan pegawai hoki,

Tuan-tuan dan Puan-puan dan

Para hadirin yang dihormati sekalian.

Alhamdulillah, bersyukur kita ke hadrat Allah SWT atas limpah kurnia dan keizinanNya jua, kita semua dapat berhimpun sempena berlangsungnya Kejohanan Hoki Dewan (Lelaki) anjuran MAKSAT Pulau Pinang yang dikelolakan oleh Majlis Perbandaran Seberang Perai

2. Sebagai Pengerusi Pengelola Kejohanan Hoki Dewan (Lelaki) ini, saya mengambil kesempatan ini untuk mengalu-alukan kehadiran para tetamu dan merakamkan ucapan terima kasih atas sokongan padu serta kerjasama erat yang telah diberikan kepada MAKSAT Pulau Pinang dalam penganjuran kejohanan hoki dewan ini. Tujuan kejohanan ini adalah untuk pemilihan pemain-pemain hoki dewan (lelaki) mewakili

MAKSAK Negeri Pulau Pinang ke kejohanan peringkat kebangsaan pada 22 – 26 April 2015 yang akan dikelolakan oleh MAKSAK Malaysia.

Sesungguhnya saya amat gembira dan berbangga kerana dapat bersama-sama saudara dan saudari sekalian dalam majlis penyampaian ini.

Tuan-tuan dan Puan-puan yang dihormati,

3. Majlis Penyampaian Hadiah **MAKSAK** ini merupakan **manifestasi terhadap usaha MAKSAK dalam memberi pengiktirafan kepada pasukan sukan hoki dewan atas kejayaan mereka.** Harapan saya adalah semoga pengiktirafan ini akan menjadi obor pembakar semangat kepada para penggiat sukan dalam perkhidmatan awam Negeri Pulau Pinang untuk terus aktif dan memberi sumbangan terhadap kemajuan sukan negeri amnya.

4. **Sukan sesungguhnya merupakan antara medium yang berkuasa dalam menyatukan masyarakat tanpa mengira pangkat, usia, jantina dan bangsa.** Kita semua, anggota perkhidmatan awam sebenarnya mempunyai peranan dalam membudayakan sukan di jabatan masing-masing. Kehidupan yang cergas dan aktif adalah penting untuk kesihatan tubuh badan dan seterusnya akan menghasilkan fikiran yang cerdas dan minda yang kreatif. Badan yang sihat juga akan melahirkan insan yang cergas dengan minda yang cerdas. Gabungan ciri-ciri ini akan mencorakkan personaliti yang terbaik, sekaligus menyahut saranan YAB Ketua Menteri supaya penjawat awam mendokong 4 inisiatif Pulau Pinang iaitu Pulau Pinang Bersih, Hijau, **Sihat** dan Selamat.

5. Saya merasa gembira kerana MAKSAK telah melaksanakan pendekatan Strategi Lautan Biru dalam penganjuran programnya dan tidak bekerja secara *silo*. Ini dapat dilihat melalui penganjuran program MAKSAK yang dilaksanakan atas sokongan, perkongsian sumber serta semangat berpasukan antara MAKSAK dan badan-badan gabungannya dengan menggunakan kepakaran teknikal di kalangan anggota Kerajaan dan memaksimumkan penggunaan kemudahan-kemudahan sukan sedia ada dengan kos yang minimum. Justeru, saya ingin merakamkan setinggi-tinggi penghargaan serta ucapan terima kasih kepada semua badan gabungan MAKSAK atas komitmen, sokongan dan kerjasama yang telah diberikan. Semoga budaya dan semangat kerja berpasukan seperti ini akan terus menjadi amalan dalam keluarga MAKSAK sehingga generasi yang akan datang.

6. Kepada penerima hadiah kejohanan hoki dewan, tahniah diucapkan. Semoga kejayaan ini akan menjadi inspirasi kepada semua penjawat awam untuk terus menunjukkan kecemerlangan bukan sahaja dalam tugas-tugas hakiki di pejabat malah dalam bidang sukan bagi melengkapkan personaliti kita sebagai penjawat awam yang serba boleh.

7. Saya menaruh sepenuh kepercayaan bahawa program sukan yang dilaksana oleh MAKSAK akan memberi impak dan *outcome* yang diinginkan serta menjadi penghubung dalam mengeratkan tali silaturahim di kalangan anggota perkhidmatan awam berbilang kaum, selaras dengan misi MAKSAK iaitu, “Menjadi Penghubung Dalam Mengeratkan Tali Silaturahim Antara Anggota Perkhidmatan Awam, Di

Samping Membantu Melahirkan Anggota Perkhidmatan Awam Yang Sihat, Cergas, Berdisiplin, Komited Dan Berdaya Saing”.

8. Saya juga mengambil kesempatan ini mengucapkan syabas dan tahniah kepada seluruh anggota kerja MAKSAK amnya dan pegawai-pegawai pengelola kejohanan hoki dewan (lelaki) MPSP di atas kejayaan mengelolakan Kejohanan Hoki Dewan ini. Semoga MAKSAK Pulau Pinang akan terus menjadi badan terunggul dalam memartabatkan bidang sukan dalam perkhidmatan awam di Negeri Pulau Pinang. Dengan kata-kata itu, saya dengan rasminya menutup Kejohanan Hoki Dewan (Lelaki) MAKSAK Peringkat Negeri Pulau Pinang Tahun 2015.

Sekian,

Wabillahittaufik walhidayah

Wassalamualaikum warahmatullahi wabarakatuh.